

Gou Daj Gizlawz Daeuj Ne

Gou daj gizlawz daeuj ne? Meh ha, gou guhlawz daeuj daengz henz ndang mwngz ne?

Lumj boh gangj gojgaeq yienghde, gou caeuq beixmbauq caemh dwg ok ndaw aen'gyoux daeuj, dwg lwi?

Go gaeugyoux de goj lumj go raeuz seizneix ndaem youq bak-dangq de, gaeu raezrangrang, banh doh gyaqbungz deihaendaen, dwg lwi?

Mbaw de goj heuswdsd, dwg lwi? Goj hai va baenz duj baenz duj hausaksak, dwg lwi? Goj miz di heiq ndeu miz didi hom mbouj ngaih ndum ndaej daengz, dwg lwi?

Aen makgyoux de goj dwg ndokvahau loenq le cij baenz aen youq gwnz gaeu, menhmenh maj-

hung, caeuq makgyoux wng caemh venj youq gwnz gyaq, dwg lwi? De hung gvaq makgyoux wng liux bae, dwg lwi?

Goj heusausau, dwg lwi? Roxnaeuz dwg henjrwkrwk lumj makbug baenz ndei ne? Roxnaeuz dwg ndinghoengz gyaundeidei lumj makyungz ne?

Mwngz ngoenzngoengz cungj yawj makgyoux majhung, dwg lwi? Mwngz ndawsim angqvauvau, dwg lwi?

Doeklaeng, dwg gou gag daj ndaw makgyoux ndonj okdaeuj, dwg lwi? Mwh gou ndonj okdaeuj de, mwngz youq henz ndang lwi? Langhnaeuz mwngz mbouj youq henz, nyaenx gou guhlawz daeuj daengz henz ndang mwngz, bongh haeuj ndaw rungj mwngz bae

ne?

Lumj raemxraiz gyanghaemh nei, mbouj hawj vunzlai yawjraen, laeglemx ndoj youq gwnz limqva, dwg lwi? Mwngz gyanghaet ndiu le, cix raen gou youq ndaw rungj mwngz lo, dwg lwi?

Lumj duzmbaj gyaundeidei nei, youq seiz banringz caemrwrwk de laeglemx aj fwedraiz mbin daeuj daxhongh, dwg lwi? Lejsing heuh mwngz, mbouj ndwet mbouj hauq couh ndwn youq dangqnaj mwngz, dwg lwi?

Nyaenx ne, mwh mwngz baeznduj raen gou, mwngz guhlawz rox gou dwg lwg mwngz ne? meh ha.

(Daj《Bonjsei Sim Lwngnyez》
(Veiz Gizlinz raiz) senj okdaeuj,
Lwgfwnzmeh/卢奋长 hoiz)



Aen Cimoq Boh'au

Boh'au yaek cawx cimoq lo, daxboh gou dangguh bouxhaici geq ndeu bae coengh ok geiqmaeuz: "Mwngz lai hab cawx gyaq Audiz."

Gvaq song ngoenz le, boh'au cawx cimoq dauq lo. Daxboh raen le doeksaetyat dangqmaz: "Gou mbouj dwg heuh mwngz cawx Audi ma? Cungj ci neix gou caengz raen nauq!" Hoeng boh'au ndaenggon dangqmaz naeuz: "Beix ha, neix mwngz mbouj rox ba? Neix dwg gyaq ci dienhdough sinhnwngzyenz ndeu." "Ci sinhnwngzyenz?" Gou nyi le couh buet gvaqbae yawj gvaqyinx. "Hw! Yiengh ci lwenqda lai, dozveh ndei yawj dangqmaz, ndang ci luemjmyabmyab, dwg gyaq ci ndei." Gou hemq naeuz. Daxboh yawjsiuj le doiq gou caeuq boh'au naeuz: "Sou gyoengq bouxcoz neix ne, cawx ci cij yawj baihrog, baenzlawz mbouj yawj dungxndaw." Boh'au riu han naeuz: "Neix raeuz gak boux hai ci swhegeij okbae beij baez ndeu ndaej mbouj?" "Beij." Daxboh gangj sat couh hai ci swhegeij okbae lo.

Boh'au daiq gou hai gyaq cidienhdough de lumj gaiq naq nei gyaep okbae, baez yaep da couh mauh gvaq gyaq ci daxboh lo. Lumjnaeuz daxboh gya dangj lo, gyaq ci de couh yiengj "huhu" nei, gaiq gyongj okheiq haenx hoenzndaem conhfofo bae, ci hamj dou bae lo. Boh'au raen le, lej caij dienhmonz, hamj gyaq ci daxboh bae ngaihnoed. Gou naengh youq ndaw ci raen youh onj youh caem.

Song aen ci neix beijvaiq 20 lai faencung le, doxdax couh sat lo. Gou cingqging dangqmaz senhbu naeuz: "Gou sijsaeq yawj le, cidienhdough buet lai vaiq, sing caem ndei, vanzlij mbaet nwngzyenz, lai vanzbauj dem. Baez doxdax neix, boh'au hingz lo."

Daxboh baez gaeu gyaep, najnyaenq naeuz: "Seizdaih hwngfat vaiq dahraix, gou riengz mbouj dad seizdaih lo, daj danci—cimohdoz—cidienhdough—cigiceh—ci sinhnwngzyenz giceh, giceh hwngfat couh dwg guekcoj raeuz hwngfat. Daengz gyaq ci gou ning mbouj ndaej lo, gou hix aeu riengz seizdaih moq bae cawx gyaq cidienhdough lo!"

(Youz Yungzhau)

Ranzdaeuz Ciengx Mou

Bohgo gou dwg boux "ranzdaeuz ciengx mou". Daxbuz dou lwnh naeuz ranzbohgo ciengx 80 lai duz mou. Baengh ciengx mou canh ndaej haujlai cienz.

Daxbuz lwnh naeuz bohgo ciengx mou, dwg aenvih cungj dinfwngz neix youz ranz de daih ciep daih swncienz roengzdaeuj. Youq mboengqseiz gyoengqde lij iq, ndaw ranz cungj ciengx geij duz mou, gvaqcieng cungj gaj saek duz mou ce gwn noh. Ciengx mou fuengbienh dangqmaz bae, aenvih gyoengq mou gwn byaeklw ngaizlw guhdaeuz. Langh dou ciengx gyoengq mou ndaej bizbwdbwd lo, couh ndaej gai bae. Ndaejnyi daxbuz lwnh, mizseiz mou bengz dangqmaz, duz ndeu couh gai ndaej cien lai maenz. Bohgo youq neix ra ndaej diuz roen baenzfouq, heij guh riengh ciengx mou lo.

Ciengx mou "bae goek noix, ndaej cienz lai". Gueng ngaih dahraix. Ndw riengh nda coq geij aen ruq, liuxle coq gijgwn haeuj ndaw ruq bae, mou couh comz gvaqdaeuj humx aen ruq gwn. Danhseih, gijmaz saeh cungj mbouj dwg lumj ruz ndaej rumz ci baenaj. Miz baez ndeu, aenvih miz duz

mou ndeu deng raq dawz lo, neix lah daengx riengh mou cungj deng raq dawz dai bae caez. Deng mbat saehhung neix le, bohgo bak mbouj gvaq mbwn sim mbouj gvaq vunz, hix mbouj naiq. Gingciengz miz vunz cam de: "Haenqrengz gaenxguh dwgengz dangqmaz cij ndaej gijneix le, youh baenzneix deng bae lo, mwngz baenzlawz mbouj simnaiq ha?" Bohgo riu naeuz: "Vihmaz yaek simnaiq ne? Bouxlawz cungj deng saetbaih gvaq. Baez neix saetbaih lumj miz vunz roq aen cungj daezsing gou nei." Neixliux bohgo bienqbaenz boux guhsaeh hunghung iqiq cungj haeujsim nyinhcaen dahraix. Gyoengq mou lij iq seizhaenx de couh dajcim coq, fuengzre binghraq dawz mou.

Cienz ndaw daeh yied daeuj yied lai, danhseih bohgo hix mbouj ndaenggon, vanzlij haenqrengz guenj ndei "aen guekvuengz seng'eiq" de. Vihliux hawj gyoengq lwngnyez gvaq ndaej lai ndei, okcienz hawj gyoengqde doeg dayoz, bohgo cungj ngoenzngoengz hwnq romh guh daengz laep, baenz le boux "ranzdaeuz ciengx mou" dahraix.

(Cau Ginhau)

